

plus de trente livres, avec force Coraux & Iayet, qui y croissent en grande abondance. Du dupuis reprenāt nostre brisee nous fismes tant que le 5. de Novembre nous nous rendismes à Brest, où nous fusmes les tresbien venus, & receus avec telle magnificence & contentemēt que nous eussions sceu desirer, tant du Sieur du Dongeon, que de tous les autres en general: puis apres nous estre là raffraichis quelque peu de tēps, nous fusmes employez aux guerres qu'ils y auoīēt cōtre ceux de Bofragara, de l'autre costé du fleuve de Anacal qui partage leurs terres, mais auant que entrer plus auant au recit de ceste guerre, ie vous veux dire quelque chose de la situation du païs, & des mœurs de ces Nouveaux François.

Premierement vous devez sçauoir que Canada est vn fort beau païs, grand & delieieux, confinant du costé de Septentrion au fleuve de Anacal, du

[12.]

[*about first half of line missing, clipped by binder*] Ocean de Nord, du costé du soir aux mōtagnes de Gales, & du Midy aux terres de Chilaga. Les principales villes sont Brest, Hanguedo, Canada, Hochilago, Foquelay, Turquas, Brinon, Bonara, Forniset, Grossot, du & Horsago, Poquet, Tarat, & Fo go, tout grosses villes & bien munies: les riuieres sont Anacal qui est vn grand fleuve, Saquenay, Bargat, Druce, & Boucorre dont la moindre est plus grosse que la Seine, sans vne infinité d'autres qu'il y a. Le Royaume de Canada peut estre enuiron de l'estenduē de trois cens lieuēs de long, & de cent cinquante de large, d'assez bonne temperature, sinon qu'il est vn petit plus froid que la France, estant colloqué sous le 50. degré de latitude, & sous le 320. de longitude, bien fertile, plein, remply de toutes sortes d'arbres, sinō qu'il ne s'y recueille point de vin, mais pour recōpense de cela il s'y trouue certaines pommes, grosses à merueille, & remplies d'vn certain suc qui est fort delicat, & enyure aussi bien que le vin, encore s'y trouue-il du vin, voire fort bon & delicat, qu'on y apporte de la Florida, qui est vn païs plus chaud, & où lō en recueille à force: pour des bleds de toute sorte, le païs en est autant fertile que la France, & mesme d'vn certain froment, que nous appellons du Triue, qui est encore plus blanc que celui que vous auez en France, voire encor meilleur, & plus sauoureux, rendāt vne farine fort douce, qui sent quasi comme la violette.

Il n'y faut labourer la terre qu'vne fois & puis semer: & vous puis assureur que d'vn boisseau de ce Triue on en recueillira plus de quarante cinq.